

Duzlingz Gvaq Ngoenz Ndeu

上林县大丰镇中心学校四(2)班 Couh Gvanvaz/周冠华

Miz ngoenz ndeu, lingzmeh heuh duzlingz iq okbae ra di gijgwn ma ranz. Duzlingz iq dingq le, couh okbae lo.

Duzlingz iq yawj doeng yawj sae, yawjyawj gizlawz miz gijgwn. Sawqmwh de yawjraen gaiq dieg sae'gva ndeu. Ndaw dieg neix sae'gva youh hung youh nduen. Duzlingz iq gig angq, buet bae genj aen sae-gva ceiq hung ndeu, got sae'gva maranz. Doq byaij doq siuq rumz, sim'angq raixcaix.

Cingq byaij dwk byaij dwk, gyaq cihuaq ndeu daj henz ndang duzlingz iq ginggvaq. Sawqmwh cihuaq baez ngengq, "Ba!" sing ndeu, aen lauxbaeg youh hung youh hau ndeu daj gwnz ci doek roengzdaeuj. Duzlingz iq yawjraen le, sim siengj: "Lauxbaeg youh byot youh diemz, gig ndeigwn." Ndigah duzlingz iq dawz sae'gva soengq hawj duz-mui, gwed lauxbaeg doq ciengqgo doq byaij coh ranz.

Cingq byaij dwk byaij dwk, duzlingz iq raen go faexbingzgoj ndeu, gwnz faex giet rim gij makbingzgoj youh hung youh hoengz haenx. Duzlingz iq simsiengj: "Danghnaeuz doek aen makbingzgoj ndeu roengzdaeuj couh ndei lai ha!" "Dungh!" Aen mak-bingzgoj ndeu doek roengz-daeuj, cingq doek deng gyauej duzlingz. "Ngoenz-neix seizheiq gou ndei lai lo. Gou aeu dawz aen makbingzgoj neix guh baenz bingzgoj bingjbai, caeuq daxmeh caez faenyiengj." Yienghneix de dawz laux-baeg soengq hawj duzdouq, gip hwnj makbingzgoj, saetdiuq byaij coh ranz.

Cingq byaij dwk byaij dwk, duzlingz

iq yawjraen gwnz namh sanq rim lwgraz. Duzlingz iq sim siengj: "Dawz gij lwgraz neix ndaem coq ndaw reih, soundaej haujlai lwgraz, aeu lwgraz caq youz roxnaeuz guh bingjlwgraz, gig hom." Yienghneix duzlingz iq couh gwn le makbingzgoj, hainduj gip lwgraz. Gip le haujlai nanz, gip ndaej daeh-iq ndeu, duzlingz iq baeg ndaej hwet in ndang naiq. Hoeng, duzlingz iq ndaw sim angqvauvau.

Banhaemh, duzlingz iq ma daengz ranz, dawz gij saeh ngoenz neix lwnh hawj daxmeh nyi. Lingzmeh riu dwk gangj: "Gip lwgraz vut sae'gva, couhgw gangj mwngz lo. Hoeng, doeklaeng raeuz yaek sou ndaej engq lai lwgraz. Aen cawjeiq neix mbouj loek." Gangj sat, lingzmeh yiengq duzlingz iq daengj hwnj fwngzmeh. Duzlingz iq ndaej mehlingz haenh, haisim dwk riu lo.

(bouxlauxsae son'gyauq: Vangz Gveiyangh/黄桂香)



Mwngz riu gijmaz ne? Beixmbauq ha, nuengx veh gijmaz mwngz cungj yawj mbouj rox, mwngz huk lai. Nuengx veh gyanghaemh gwnzmbwn go, doenghgij diemj neix dwg ndaundeiq go, gij miz raemxlangh neix couhgw dahmbwn go, henz dah dwg aen ranziq go, veh ndaej mbouj lumj ma? Baihde dwg camhdienhraemx go, aen camhdienhraemx henz dah laj bya de mbouj dwg yienghneix ma?

Mwngz riu gijmaz ne? Beixmbauq ha, mwngz naeuz dahmbwn mbouj miz raemx ma? Mwngz huk lai. Mbouj miz raemx guhlawz heuhguh dah ne? Mwngz goj caengz ndaej bae gwnzmbwn yawj gvaq, guhlawz rox dahmbwn mbouj miz raemx ne? Langhnaeuz ndaw dahmbwn mbouj miz raemx, vihmaz gwnzmbwn mbangjseiz couh doekfwn hung baenzneix ne?

Mwngz riu gijmaz ne? Beixmbauq ha, mwngz naeuz gwnzmbwn mbouj miz camhdienhraemx ma? Mwngz huk lai. Gwnzmbwn mbouj miz camhdienhraemx, guhlawz miz byajmig ne? Nanzdauh gij dienh byajmig de dwg daj camhdienhraemx gwnznamh soengq hwnjbae ma? Couhsuenq dwg yienghneix, banneix gwnzmbwn lij caengz miz camhdienhraemx, hoeng daengzcog coj miz dahraix. Boh mbouj dwg naeuz, gaeng miz vunz naengh ruzmbin hwnj gwnzmbwn bae gvaq ma? Caj nuengx maj laux le, nuengx goj hwnj gwnzmbwn bae, bae laeb aen camhdienhraemx ndeu, laeb youq bangxhenz dahmbwn. Daengz seizde, gij camhdienhraemx nuengx laeb haenx diemj rongh lailai aen daengdienh, ndaundeiq gwnzmbwn couh engq lai lo. Beixmbauq ha, mwngz goj baen mbouj cingcuj aen ndaundeiq lawz dwg aen ndaundeiq caen, aen ndaundeiq lawz dwg aen daengdienh bw.

(Daj《Bonjsei Sim Lwngnyez》(Veiz Gizlinz raiz)senj okdaeuj, Lwgfwnzme/卢奋长 hoiz)

Caeuq Daxmeh Hag Dinfwngz

Daxmeh dwg ranz dou bouxsughangz guh gijgwn ndei, gij dinfwngz dajcawj de hawj gou gingqboiq dangqmaz, neix le gou couh siengj baiq de guh lauxsae, caeuq de hag gij dinfwngz guh duzungq gyauejho mienz, gou ceiq maij gwn gijneix lo.

Seiz couhmoz, gou caeuq daxmeh guhdoiha daengz hawciengz cawx duzungqlungz, cij raen gyoengqde vad "cungqcax" swheij, yienghsiengq lumj naeuz yaek cak duet cageug ok nei. "Baenzlawz genj duzungq ne?" Aen vwndiz neix doiq gou bouxmoq neix daeuj gangj hoj lai. Daxmeh raen gou miz hojnanz, lejsing doiq gou gangj mwngz yaek cawj duzungq ndeigwn, couh yaek genj aeu doenghgij gungq mizrengz diuqyetyet de. Gou maeuq roengzdaeuj, sijsaeq yawj yaep ndeu, gietdingh daiq doenghgij duzungq gyauez hoenx, gyauez ning haenx bae liux.

Ndaej daxmeh vixinx, gou dawz faggeuz okdaeuj, yaek "hai laeng", danhseih gyamq duzungq ndongj lai lo, gou mbouj rox baenzlawz guh, najbyak gou menhmenh ok hanh lo. Cieplaeng gou couh raen incoeg lai, gou mbouj re

le deng duzungq hung ndeu nap fwngz gou. Daxmeh raen gou "gvanghyungz deng sieng" lo, couh cieq faggeuz ndaw fwngz gou daeuj laebdaeb "hoenxciengq". Gou sim caepcat muengh duzungq, sim ngeix: Nanzdauh gou hag dinfwngz mbaek daih'it couh deng goengq ma? Daxmeh raen gou sim mbouj fug saw, gangjriu naeuz: "Bouxhajcawj hung gaem goeksieg, aen yinvu dajleix duzungq couh gyau hawj gou guh la!" Gou baez dingq, gikdoengh le diuq hwnj sam cik sang bae.

Gou lejlej hai meizgicau, ciuq gij fap daxmeh son gou haenx bae guh, coq di youz ndeu gonq, liuxle coq diuzliu, cieplaeng coq duzungq fan cau, caiq laeng coq gyauejho mienz. Mbouj gvaq geij faen cung, gij hom gyauejho mienz con haeuj ndaw ndaeng daeuj. Gou ndenq duzungq ndeu hawj daxmeh cimz gonq, daxmeh doq gwn doq haenh: "Mwngz guh duzungq gyauejho mienz ndeigwn dahraix!" Gou dingq le ndawsim angqvauvau, gikdoengh le naeuz: "Cijaeu mwngz siengj gwn, gou ngoenzngoenz guh hawj mwngz gwn!"

(Cwngz Swjliuj/程子柳)

